

KOLOSIAN

vdwa Paul gv Siti Jinam

Mintamchonam

Paul gv sitiv kolosae gvrja lo Kolosian mvngjwngnv vdwa lvkla jito, vv banggu akobv rinv Epesias gv doonyi chaagia peelvbv doonv Asia mainor aralo aadu. Soogv gvrja si Paul gv mvkuk jilin yama namgo, vbvritola Paul gv rigvdagv la rikudaku mooku ara hoka aadu, Epesias banggu lokv kodungkua rinv vdwa Paul vnglin jimu la ridu, vv Asia gv Roman mooku gv Kepital bv rinv banggu bv rinv lokv ngv vngmu jidu. Kolosia gv gvrja lo mvvlarula tamsarnv doodu vla Paul chinto, Oogv Pwknvyarnvnyi chinam okv alvjv bv ringlinbaalin nama paanam lvgabv “dowjeklo rigvdogvnnv okv tujupkunam” bv mvngla akingobv kumrung dubv ridu vla mintoku. Vkgv aolo, soogv tamsarnv vdvw vbvka mindvto, ayakmvu nam sum okv dvnam gv lvkwng so dvmatvngma dubv rinam sum arw rungubv rirungdu okv kvvbi ogu ogugo arw dubv Pvbv doonam sum ridubv rirungdu.

Paul jv jv rung v kristan doin lokv svbv tamsarla minam vd w sum hakla vv makv vla siti lvktoku. Ninyigv mirwk sikunam gv haapok jvngv si Jisu Kristo mvnwng gv turku nga jila kujinv okv oogv kvvbi mvngjwng gunv okv si ninyigv lokv adu modubv rila risargwngsar la rilaria gv vdu. Jisu Kristo gv lokv, Pwknvyarnv nyiamooku am pwklinyarlinto okv ninyigv lokv lvkodv um atubongv aw gvlo laakur siduku.

Jisu Kristonyi akingobv rinam mvngchik lokv nyiamooku si ringlinbaalin riku vla mvngtin sinango doodu. Vbvrinamv Paul alvjv bv mvngjwngnv vdwa singnam lvgabv si kairungnv tamsar svgo dodudw um milin jitoku.

Si chinsv go doodu, Paul lvgabv siti sum kolosae lo gvvlwk jinv Taichikus ninyia Onesimus vngbam la vngtoku, Paul soogv nyira gv lvkwngbv *Philemonnyi* siti am lvkto.

Arwng lokv darlinnam

Mintamchonam (1:1-8)

Kluginv dodungsunv okv Kristo gv kudungkua (1:9-2:19)

Kristo aralo anv bv singnam (2:20-4:6)

Minyungminya (4:7-18)

¹ Paul lokv, Pwknvyarnv gv mvnglwkw lokv Jisu Kristo gv apostol akobv rinv, okv ngonugv achi-boru Timoti lokv—

² Pwknvyarnv gv nyi Kolosae lo doonv, ngonugv lvgabv Kristo gvlo mvngjwng sinv ajin vdwa:

Ngonugv Abu Pwknvyarnv nonua ayanam okv sarsopoyo nama jilaka.

Umbonyikv vnam gv kumnam

³ Ngonugv Ahtu Jisu Kristo gv Abua, vdwlo nonugv lvgabv kumrinyi, ngonu Pwknvyarnvnyi umbonyikv vbv jidunv. ⁴ Vkvlgavbolo nonugv Jisu Kristonyi mvngjwngla okv Pwknvyarnv gv nyi vdwa nonugv paknam am ngonu tvvpadu.

⁵ Vdwlo jvjvrungnv doin, alvnnv yunying ngv, nonu gvlo atuake bv aacho kubvdw, mvngtin kumnam gv lvkwng lo tvvpatoku. Vkvlgabv nonugv mvngjwng okv pakmisiinam lvgabv nonu ogugo

mvngtin sidudw, um nonugv lvgabv nyidomooku lo pvvjidunv. ⁶ Pwknvyarnv gv anyuaya nam lvkwnv lo tvvtutvke bv nonugv pingkolo tvvpa dw alu lokv okv si jvrv gurung vla chiri lokv gamlv ngv chinggodogo mooku soka gosik karla okv boktalwkji kunam am laalwk jitoku. ⁷ Nonu Pwknvyarnv gv aya nga, ngonugv* pakbu ribam ajin, Oogv ngonugv lvgabv mvngjwng sila Kristo gv kudungkua rinu Epapras gv lokv ngv chintoku. ⁸ Hv Dow lokv nonua paknam jilwk kunama ngonua mintam jitoku.

⁹ Soogv lvkwnv lo nonu lvgabv ngonu tvvpa dala riya lokv nonu lvgabv, ngonu kumbv jikila ridunv. Ngonu Pwknvyarnvnyi ninyigv mvnglwk lo chinampanam, mvngkimvnglak okv tvvlakbulak gvnvrv dow jilwk nama nonu gvlo pwklwk jitokv vla kumdunv. ¹⁰ Vbvrilolo nonu Ahtu gv mvnglwk bv nonu singla reku okv ninyigv oguaingbv mvngjwk dudw vbvching mvngpu dubv ribv jila reku. Nonugv singnamrinam lo nvgwng mvnwng gv alvnam kudungkua ngv boklinre, okv Pwknvyarnv gvlo nonu chinvpanv govv singchare ¹¹⁻¹² Ninyigv yunglitv jwkrwv mvnwng ngv oogv anv vv nonua gwlvksopa dubv mvgv yilaka, vkvlgavbolo ogumvwnv gv hirukaya nam dvdv nga chitam sila ridula saktv lakdubv. Okv Pwknvyarnv ogugo loung gv karv lo ninyigv nyi vdwgv lvgabv pvvchingpvvmu jinam um nonugv baak am paadubv mvrv, Abunyi

1:7 Kol 4:12; Pilem 23 * **1:7** Ngonugv; Kvgonv kitaplo doodu Nonu.

mvngpu gvdula umbonyikv† vtoka. ¹³ Kanvparam gv jwkrw lokv hv ngonua ringlin toku okv ninyigv Kuunyilo gv karv lo laalwk laku ringlwkto. ¹⁴ Vb-vriku lokv gvngv ngonua anyujvbv rimindakmin moduku okv ngonugv rimur am mvngnga jitoku.

Kristo gv kudungkua okv nyidam ngv

¹⁵ Kaapa nyolanv Kristo kaapa nyoka manam Pwknvyarnv aingdo. Hv bvngtubvngke bv bvngnam Kuunyilo go, pwklyarlinnam dvdv nga kaiyachok nvgo. ¹⁶ Holvgabv ninyigv lokv nyidomooku lo doonv okv sichingmooku lo doonv, kaapanam okv kaapa manam ikimora, dowjwklo jwkrw, atu vdwa, rigvdonv, okv tujupkunam vdwa aka mintakla mvnwng nga Pwknvyarnv Pwklinto. Pwknvyarnv ninyigv lokv ngv chinggodogo mvnwng nga pwktoku okv ninyigv lvgabv pwktoku. ¹⁷ Ogumvwnvng ngv dooma tvbv Kristo doocho linto, okv ninyi gvlo akingobv ridula ogumvwnvng ngv atubogv dooji kolo doosu toku. ¹⁸ Hv ninyigv adwnanmar gv dumpo ngv, oogv adwnamar vv gvrja ngv; hv adwnamar gv turlin kobv ridunv. Hv sipikula turkur kunv, Hv mvngchik ogumvwnvng nga doocho yachok kunam lvgabv Kuunyilo bvngtu bv ridunv. ¹⁹ Holvgavbolo Pwknvyarnv ninyigv Kuunyilo nga Pwknvyarnv gv ridungnga ridubv ninyi atubogv mvngnam lokv mimbwk toku. ²⁰ Vbvrikunamv, Kuunyilo lokv, Pwknvyarnv ninyi atubogv gvlo chinggodogo nga laakur lwkdu kubv mimbwk jitoku.

† **1:11-12** Mvngpu gvdula ombonyikv vtoVmallo Saktv gvdula okv mvngpu. Okv ombonyikv vtoku **1:14** Epe 1:7 **1:18** Epe 1:22,23 **1:20** Epe 2:16

Pwknvyarnv ninyigv Kuunyilo gv daapo lo oyi‡ sarjinam lokv sarsopoyo dubv mvtoku holvgabv nyidomooku gv okv sichingmooku gv, anyi gv ogumvnnwng dvdv nga ninyi gvlo laakur lwktoku.

²¹ Lvko nonu Pwknvyarnvnyi adu laku rito okv vkvlvgavbolo nonugv alv manv oguogu rinam lokv okv mvngmur kunam lokv ninyigv nyimak bv rito. ²² Vbvritola vjak, ninyigv Kuunyilo gv adwnamar am sijikunam lokv, Pwknvyarnnv ninyigv ajin bv mvtoku, nonua darwk dubv, darkw dukubv okv gungnying go kaaku madubv, ninyigv dooku lo doomu dukubv vla mvtoku. ²³ Vv jvjvklvbv, nonuv jwkjwkvrvk bv ribv la okv lvngtung tunlwkrunglaka, okv nonugv mvngtin sinam gamlv nga tvvpa laku paaku bvdw um nonu atubongv dvlobak mabv ritoka. Soogv gamlv nga nyiamooku mvnnwng lo minggo kunam gv soogv pakbubv Paul ngo ripvkunv.

Gvrja gv lvgabv Paul gv kudungkua rijinam

²⁴ Okv vjak, ngoogv nonu lvgabv hirukaya bv hinam lvkwng lo ngo mvngpu bv mvngsu dunv, vkvlvgavbolo ngoogv adwnamar lo hirukaya bv hinam si gvrja gv lvgabv, vjvlodvbv oguaingbv Kristo gv ninyigv adwnamar am hirukaya bv hila ritungnga ripwngrinya ridubv ngo ridur dvnv. ²⁵ Okv ngam oogv nonugv alvnam lvgabv kudungkua riya dubv jinv, Pwknvyarnv gv lokv ngam gvrja gv pakbu ako bv mvto. Hoogv kudungkua vnamv doin am japnyachika jidubv kudungkua jinamgo. ²⁶ Oogv

‡ **1:20** Ninyigv Kuunyilo gv krosslo oyi sarjinam lokv; Vmalo Ninyigv Kuunyilo gv erin peelwkjinam lokv.

klukuchu gv vngrokunv nyia adwnamar am chimu mabv Pwknvyarnv gv vvching kunamgo vbvritola vjak ninyigv nyi vdwa kaatam la riduku. ²⁷ Pwknvyarnv gv rungnamv ninyigv arwng gv vvsu nama ninyigv nyi vdwa chimpa modubv vla, soogv nyitv okv vvsinam yunglit si hv nyi mvnwng gv lvgabv doogvto. Okv oogv vvsinam vv Kristo nonugv aralo doodu, vbvrikunamv vv nonu Pwknvyarnv gv yunglitnam aba lo rireku. ²⁸ Vkvlgabv ngonu Kristo gv lkwnglo mvnwng gvlo japgo kardunv. Ngonu nyi mvnwng ngv Kristo gvlo akin gobv rila gvrila mvngki laknv vrungbv ritola Pwknvyarnv nvchilo laalwk dubv mvngkimvnglak lokv gamrw okv tamsar la bunua ridunv. ²⁹ Sum ripwnggrinya gvvdubv vla ngo gvlo oogv kudungkua ridunv jwkrw lokv okv oogv kristo gv kairungnv gwlwk jinama ngo rinvla okv raitungtung bv ridukunv.

2

¹ Ngo vdwgo nonugv lvgabv okv Laodisia lokv doonv lvgabv okv ngam kaachin minsu la rimanv kvvbi mvnwng gv lvgabvka ngoogv rinam am minji nvpv mvngdunv. ² Ngoogv svbv rinamv bunu gvlo pwktvpwkru dubv okv akin gobv pakmisila dubv, okv oogv jvjvrungbv chinampanam go laalwknamv nyitvnyigam bv rirungdo vla si nonua mvngchin sidubv. Svkvnv lamtv bv riku lokv bunu Pwknvyarnv gv vvsu nama chintoku, oogv vv Kristo ninyi.* ³ Hv Pwknvyarnv

* **2:2** Kristo, ninyi Pwknvyarnv gv vvching nama; Kvgonv kitap lo doodu Pwknvyarnv gv vvchingnam; Kvvbi lo doodu Pwknvyarnv okv Abu okv Kristo gv vvchingnam.

gv mvngkimvnglak okv chingkikpakik am vvch-
ingku jampa gv chabi ikuk nvvji nvnv ngv.

⁴ Vkvlgabv, ngo mindunv, nonuno nyi kvvbi
am largumlarya yakula vdwloka kupku yoka,
vdwnvgo alv kaapa dubv bunu tvvpukain bv
minjv ka tvvyoka. ⁵ Holvgabv ngo awv nonu
gvlo dooming gvma lachin, ngo Dow lo nonugv
lvkobv vjvlodvbv riming gvdunv, okv ngo nonugv
Kristonyi mvngjwng la rinam am akin gobv rila
vngdvng alvbv doonam am ngo kaala himpusiya
dunv.

Kristo gvlo singdung am dungmikunam

⁶ Jisu Kristonyi nonuno gv Ahtu gobv laarwk
sidu kubolo, ninyigv lvkobv singnam am akin
gobv ritolaka. ⁷ Ninyigv arwng lo nonugv mi-
ami nga alv rungbv rilwkla hargap lwkmu laka,
ninyi gvlo nonugv singnam am singlwkrilwk
tvlaka. Okv nonugv mvngjwng nama kokwng
lo vngdwng motolaka, nonua oguaingbv tamsar
bvdw. Okv nonugv mvngpula umbonyikv vla
hartvnama kaata sitoka.

⁸ Vbvrikunamv, sum kaatoka, Kristo gv lokv
rimabv okv chinggodogo gv rigvnnv dow vd-
wgv, okv nyia nyidung lokv gv tamsar la oogv
aanv, nyia mvngkimvnglak lokv kupgv jinv arv
kaama bv minyok lwkji kongka um nonu yvnyika
nyira moku yoka. ⁹ Holvgabv, ninyigv nyia nyipw
bv doori lo, Pwknvyarnv gv singdung ngv kristo
gvlo doongam sito, ¹⁰ okv ninyia lvkobv akingobv
rikubvdw nonu gvlo turnam mvnwng nga jitoku.
Hv Dowjwklo mvnwng nga rigvnnv okv tujupku-
nam vdwa rigvnnv dumpoyachokv.

¹¹ Nonuno vdww Kristo gvlo akin kunamv ayakmvu kunam bv ridukunv, vv nyia adwnamar gv ridung lokv ayakmvu bv rima dunv, vbvritola Kristo gv lokv ayakmvu kolo mvu minggvla ridunv, soogv atubogv rimur kunam so gwlvk lokv ajarabi dubv laalin dukunv. ¹² Holvgabv vdww no baptisma laapv kudw, nonu Jisunyi nyibong rikulo riming gvvku dunv, okv baptisma laadaku nonugv mvngjwng lokv, ninyia sinam lokv turmunv Pwknvyarnv gv jwkrwv, rirap gvlaku sinam lokv kristo gv lvkobv nonuaka turmu dukunv. ¹³ Nonugv rimur kunam lokv lvkingo nonu dowjwklo ngv sito okv vkvlgavbolo nonu Pvbv nga chima bv rila jentail bv rinam lvgabv rito. Vbvrijvka Pwknvyarnv vjak nonua Kristo gvlo turdu kubv laalwk toku. Pwknvyarnv nonu mvnwnng gv rimur am mvngnga jitoku. ¹⁴ Hv daapolo taki kodula Pvbv lo rima bvkv vnam ngonugv gunying rila dorsv nga mvnwnng nga laapak jitoku. ¹⁵ Okv Kristo daapo hoka ninyigv Atubogv rigvnnv dowjwklo jwkrw am okv tujupkunam am tulin sutoku;† Hv nyimak am mvgam tvla rinam aingbv rumdu gokrv kola bunua lvgv kola mvnwnng gv nyi kaagelo kaamin kolo vnggv kola riku tvku.

¹⁶ Vkvlgabv, nonu ogunv dvnamtvnngnam lvkwng loma jvka, Jius doonualu lvkwng loma jvka, poolu karlin la dvmintvnngmin lvkwng loma

2:12 Rom 6:4 **2:13** Epe 2:1-5 **2:14** Epe 2:15 † **2:15** Kristo kross hoka ninyigv Atubogv jwkrw okv tujup kunv nvnv yalu gv Jwkrw a ajarabi sulin toku; Vmalo Darwkchongjornv rigvdognv lokv okv ninyigv jwkrw lokv ajarabi sulinto. **2:16** Rom 4:16

jvka, alu kanwnv lvkwng loma jvka ogu angusinv pvv rinamdaknam go mvlwk koyoka. ¹⁷ Svkvnv ogumvwnng si kokwng gv aainvgv lvgabv oguogu doonyum ako mvngchik gov ridunv; jvjklv jvngv si Kristo ¹⁸ Nyidogindung am kumnam okv oogv nyi alv kaapa dubv reniakpvchak bv rila alv-manv lo kaatam gvnv okv nyikrw kaanam vkvnv riku lokv minggu gvrila kai bogobv mvngbo sula yvnyika nonuno atubonga miyakaya koodubv riyoka. Ogulvgavbolo svkvnv nyi adwnamar gv mvngbosakbo lokv oguguka kaama tvvlaka mvngbosakbo sula ridu. ¹⁹ Okv yvvdw adwnamar lokv dumbo bv ridunv, vv Kristonyi gakbwng la risv nga apak la ridu. Adwnayak mvnwnng ngv Kristo gv arwng lokv singcha dunv asikamik sitola akingobv aadum sidu okv Pwknvyarnv gv mvngkubv singcharicha tvkv vkubv vbvching singcharicha toku.

Sinam okv turnamv Kristo gvlo lvkinv

²⁰ Nonu Kristo gv lvkin bv sitoku okv vv chinggodogo gv rigvnnv dow vdwgv lokv lindukunv. Vbvrkunamv, nonu ogubv nyiamooku sokv gvbbv mvngbvla ribv ridunv? Ogubv sikvnnv pvv nga tvvla ribv donvla? ²¹ “Sum gakbwngching la doyoka,” “Sum dwkwrikw laka riyoka,” “kvvbi aka mvsik mabvka”? ²² Svkvnv oguogu minggv dunam mvnwnng si lvko bunu rinvnngv kubolo alugunyi ogu arv kaaku mabv nyenamnyepak dukunv; vkvnnv vv bunu nyia vdwgv tamsarnam okv pvv mvnam mvngchikgo. ²³ Vbvrinam gvbbv svkvnnv pvv

vdwgv mingku sum tvvnamv nyidogindung vdwgv kumla bunugv mvngkimvnglak bv tvvdu kaadu bv kaatam namgo, okv bunugv mvvnam lokv ribambamli lala gvla ridu, okv bunu adwnamar am tulwk sumabv ridu; vbvrijvka adwnamar lokv bunu oguguchin rila gvnyu sula mare.

3

¹ Nonu Kristo gvlo lvkin bv turkur pvkunv, vkvlgabv nonugv haapok am nyidomooku lo oguogu yabv mvngto laka, Pwknvyarnv gv lakbik peelv gv dotum lo dooming gvnyv Kristo gv dooku lokv gvngvku. ² Nonugv tuktumlo oguogu mvngnamrinam am tolo gvbv mvnggap tvlaka, sichingmooku so gvbv mvngku yoka ³ Holvgabv nonu sitoku, okv nonugv turnamv Kristo gvlo akin gobv rilwk dukula Pwknvyarnv gv aralo doodu kunv. ⁴ Nonugv turjv jeji kunamv Kristo okv vdwlo hv kaatam rikudw, vbvribolo nonuka ninyigv lvkin bv kaatam ngurv riku okv ninyigv ungnam ak-inbv ungreku.

Aku bv turnam okv anwnv

⁵ Vkvlgabv nonugv arwng lo sichingmooku sokv kudungkua mvngdungridung am nonu um sipaksirak moorung dubv rirungtoka, vbv mindunam v yonambunam gwngmursingmur, mvngru kasarnam, yonwngnam, alvmabv mvvbomvliknam, okv kabiotarinam (holvgavbolo morti am kumnam aingbv ridunv). ⁶ Vkvnyv oguogu alvmabv vbvrinv oogv yvvdw ninyigv mingkulo vngma dudw vbvrinv lvgabv Pwknvyarnv gv

haachi namv vkvgvlo aalwkre.* ⁷ Vdwlo nonugv turnam lo bunua vbv rigvdogv la ribvdw, lvkin gv lvgabv nonu oguaingbv vbvching mvngdudw nonugv vbv mvngkulo rila doola do.

⁸ Vbvrijvka vjak nonuno vkvnnv oguogu mvnwng sum kayu tvkuka: vbv mindunamv haachinam, saktvnam, okv kaanwng manam. Mvngyakaya okv noogv naptap lokv anyingaru paami sijinam vkvnnv gaam vdwloka milin mabvka. ⁹ Nonu ajinanyingnga mvvmi siyoka, ogulvgavbolo nonu kvvlogv atubogv ribvnam akuaram am kayu pvkunv ¹⁰ okv vjvgv anw kunv aw am gvpv kunv. Nonua soogv Pwknvyarnv gv anwnv si, ninyia alvbv nonua chingpwngchinya la chingku dubv vla, Pwknvyarnv gv ninyigv aingbv ridubv anw bv mvbwng dunv. ¹¹ Vbv Kaakunamv, so Jentail gula Jius yago vla minsv kaama, ayakmvu dolo okv ayakmvu madulo, chimapaamunv, nyira, okv ajarabi bv ridulo, vbvritola Kristo mvnwng gvngv, Kristo mvnwng gvlo doodunv.

¹² Nonu Pwknvyarnv gv nyi ngv; hv nonua pakdu okv ninyigv atubogv nyi bv rinam lvgabv gakdu. Vkvlgabv, nonuno svkvvv vdw sum dinchikochi bv ridula nonugv awlo vji koonam bv kootolaka, ayanam, angamai minsunam, damd-vnam, saktvnam, svkvvv sum doomu tvvlaka. ¹³ Ajinanying gv lvkobv saktvla ritolaka okv vdwnvgo ajinanying gonv nyiru gaambv nonugv lkwngbv oguogugo minjvka mvngnga jitolaka.

* **3:6** Kvvgonv kitap lo si kaamadu Oogv yvvdw ninyigv mingkulo vngma dudw. **3:9** Epe 4:22 **3:10** Epe 4:24; Atk 1:26 **3:12** Epe 4:2 **3:13** Epe 4:32

Nonua Ahtu gv oguaingbv nonugv rimur mvn-wng nga mvngnga jipvdw vbvching nonuno ka ajinanying gv rimur mvnwng aka mvngnga jito laka. ¹⁴ Okv so paknam sum soogv so mvp-wng laka, oogv pakmisiinam lokv rvbwng albbv ogumvnwng nga akingobv gakdam simure. ¹⁵ Jisu gv sarsopoyo gvnv jilwknamv nonugv mimbwk nvnvam lvgabv jito; holvgabv soogv sarsopoyo bv riku sokv Pwknvyarnv nonua adwndinkin gobv ribam dubv goknv la goktoku okv vkvlvgabv umbonyikv vtoka. ¹⁶ Kristo gv doinv nonugv haapok mvnwng lo akomaring lwkdubv doolwk rungmu dubv ridu. Mvngkimvnglak mvnwng am ajin anyingnga tamsarkinu minsu laka. Mir-imimpak miminla, nitin miminla, okv darwknv gaana lo gaatoka; nonugv haapok lokv Pwknvyarnvnyi mirimimpak bv umbonyikv vto laka. ¹⁷ Vbvrinamv, nonu ogumvnwng nga rijvka okv minjvka, Jisu Kristo gv amin lokv rirungdubv ridu vbvching nonuno ninyigv lokv Pwknvyarnv abunyi umbonyikv vla mintolaka.

Anwnv Turnam lo Atubogv rilwkdolwknam

¹⁸ Nywng vdww, nonu atubogv nyilu gv arwng lo tulwk sila ritoka, ogulvgavbolo vv ogugo risv vdww nonugv kristan rinw vdwwgv rirung svngvka.

¹⁹ Nyilu vdww nonu, atubogv nywng nga albbv paktolaka okv vdwloka bunua mintvmirv mabvka.

²⁰ Umvuu vdww nonu, nonugv anvabu gaam mingkulo vngto laka vv nonugv kristan bv rinam

gv riching vrung ngv, ogulvgavbolo vbvrinamv Pwknvyarnv gv mvnglwkw bv ridunv.

²¹ Anvabu vdwv, nonuno umvuu am tvvkyong pakdubv minchimiya mabvka vbvmajeka bunu vdwv kokwng lo mvngjong silaka riya nvpvka.

²² Nyira vdwv, nonuno nyia sokv atuayu gv ogu ogugo risvngsv go doodudw mingku mvnwnglo vngto laka, bunu vdwlo kaaredw oogv kaagelo kaaku mvngchik dubv riyoka ogulvgavbolo bunua kaajwk kodubv vla; vbvritola haapok lokv dinchi dula ritolaka ogulvgavbolo Ahtu gv lvgabv busu dula kaajwk kodubv ritolaka.

²³ Ogugo nonu ridudw, kudungkua nga hapok lokv mvnwng nga ritolaka, nyi vdwgv lvgabv rimabv okv Ahtu Jisu Kristo gv lvgabv rijinam aingbv nonu ritoka. ²⁴ Mvnggap tvvlaka hv ogugo ninyigv nyi vdwgv lvgabv amin vvpv jipvdw oogv vvpv jinam um Ahtu nonua jire. Ogulvgavbolo nonugv rijivngji nam Ahtu jvjvklv jvngv Kristo. ²⁵ Okv rimurnv dvdv ngv bunu oguogugo rimur pvdw um rijo ngam paakur sureku, ogulvgavbolo Pwknvyarnv mvnwng nga karingsiching bv jwngkadaka dunv.

4

¹ Atu vdwv, nonugv nyira nga anyakayak bv okv minchimiya mabv rigv tvlaka. Mvnggap tvlaka nonuka nyidomooku lo Ahtu svdv go doopv nvla.

Minsar kunam

3:21 Epe 6:4 **3:22** Epe 6:5-8 **3:25** Det 10:17; Epe 6:9 **4:1**
Epe 6:9

² Kumnam am kumbv tvlaka, okv nonugv kumla riyinyi chvrvsopa bv kumtolaka, Pwknvyarnvnyi umbonyikv vla kumto laka. ³ Vbv dvdvbwlo nonu kumredw ngonu lvgabvka kumji laka, vkvlgavbolo Kristo gv arwng kokwngnv ninyigv doin sum gamdak alvbv japgo karnv nvnv nga Pwknvyarnv ngonua jire. Vkvlgabv vjak ngoogv pachipatwk doodung dunv si holvgabv doodunv. ⁴ Vbvrikunamv, ngoogv minsvpasv am, ngo rvbwng alvbv minla dubv, kumto laka.

⁵ Ogolo lamtv chinglo mvngjwng manv dookulo nonu mindu padudw um nonu alvbv chinvpanv bv mintorito laka, nonu gvlo ogunv gamdak go rinvvngnv paadudw um alvbv kaatamritam nvvto laka. ⁶ Nonugv minam am tvyenkapak dubv okv tvnwng dubv mirung tvlaka, okv nonu nyichar mvnwng nga ogunvgo mirwktamrwk svngvdw um chindu bv rirung tvlaka.

Mintarminya bv kumrwklwtak sikunam.

⁷ Ngonugv aya minsunam ajin Taichikus, oogv jwkjwkvrvk dubv kudungkua rinw okv Ahtu gvlo pakbu bv kudungkua ribam ajin, vv ngoogv lkwnglo yunying nga nonuam mintam jire. ⁸ Vkvlgavbolo ngonu mvnwng ngv oguaingbv ridungdakdung dunvdw, um nonua mvngpu monam lvgabv mintvmiru jimu dubv vla ngo ninyia nonu gvlo vngmuto. ⁹ Ninyigv vngkulo onesimusnyi lvkobv vngming gvvmu dunv, oogv nonugv apumara lokv achialv bv aya rungngv okv

mvngjwng rung nv rinv ajingo. Bunu vdvw soogv ridungdaktung nam dvdv nga um nonua minjire.

¹⁰ Ngam patwk dooming gvnv Aristarkas, okv Barnabas gv nyingbwng, Mark bunu vdvw soogv kumrwklwktak sinam gaam sum nonua jilwk dunvka. (Mark gv nonu gvlo aalwk lakula riyikunyi nonuno alvbv kumrwklvtak silaka vla minam gaam sum alvbv tvvcho tvku.) ¹¹ Justus vla minam, Josua ka nonua kumrwklvtak sinam gaam sum jilwk dunv. Hoogv Pwknvyarnv gv karv lvgabv ngoogv lvkobv kudungkua rinv ngv soogv nyidum aom mvngchik si riming gvvtoke, okv bunu vdvw ngam maatar alvbv modur toku.

¹² Nonugv atwng lokv akingonv okv Jisu Kristo gv kudungkua am rinv, Epapras gv lokvka alvbvkv vla kumrwklwktak sinam gaam go jilwkdu. Hv nonugv lvgabv dinchi rungbv, nonugv Pwknvyarnv gvlo vngdvng alvbv doodubv, kamchik kunv gobv okv Kristan vrungbo mvngsu ladukubv, Pwknvyarnv gv mvnglwkw dvdv ngaka tvvpwngtvvnya la ridubv vla kumbv la riduku.

¹³ Nonugv lvgabv okv laodisia okv Hierapolis nyi vdwg v lvgabv ninyigv kudungkua rijinam um ngo ngw awv minji ladu. ¹⁴ Ngonugv ayanam ajin daktor, luk okv Demas ka bunugv kumrwklwktak sinam gaam am nonua jilwk la ridu.

¹⁵ Ngonugv alvbvkv vla milwknam um Lao-disia gv mvngjwngnv vdwa okv Nympanyi okv vkgv naam lo gvrja doodumdopa sinv vdwa

4:10 Nyim 19:29; 27:2; Pilem 24; Nyim 12:12,25; 13:13; 15:37-39

4:12 Kol 1:7; Pilem 23

4:14 2Tim 4:11; Pilem 24; 2Tim 4:10;

Pilem 24

minji laka.* ¹⁶ Nonuno soogv siti sum rironam kokwng bv, Laodisia gv gvrja ara loka sum rimu rungduv riji tvvlaka. Vbvripia chingbv, Laodisia ara lokv mvngjwngnv vdwgvlo jilwk jinam siti umka nonu puri rilaka. ¹⁷ Okv Arkippusnyi mindu, “Ahtu gv kudungkua ridubv jinam am alvbv ringam nyato laka.” ¹⁸ Awgv laak daadw lokv ngo lvkdunv: *Paul lokv kumrwklwtak sinam* Ngoogv rvngja gvvnam am mvngpa mabv riyoka! Pwknvyarnv gv anyuaya namv nonu gvlo doomin gvi laka.

* **4:15** Nympanyi okv vkvgv naam lo; Kvggonv kitaplo vbv doodu Nypas okv ninyigv naam lo. **4:17** Pilem 2

ANWNV GAMLV
Tagin first Bible translation based on TEV (Good News)
copyright © 2018 The Word for the World International

Language: (Tagin)

Contributor: The Word for the World International

The New Testament in Tagin
Published as

ANWNV GAMLV

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

PDF generated using Haiola and XeLaTeX on 22 Feb 2024 from source files dated 15 Apr 2023

65e96bca-33d6-5dc6-a8ee-da485ecfb7ed